



ՄԱՍԼՈ ՀԱՂՈՐԴԱԳՐՈՒԹՅՈՒՆ

ԱՆՀԱՊԱՂ ՏԱՐԱԾՄԱՆ ՀԱՄԱՐ

Ապրիլի 10, 2019թ.

ԿՈՆՏԱԿՏԱՅԻՆ ՏՎՅԱԼՆԵՐ

Գևորգ Մնացականյան, Հասարակայնության հետ կապերի պատասխանատու
Երևանի Կոմիտասի անվան Պետական Կոնսերվատորիա
Բջջ.՝ (+374) 94 12 99 57
Էլ. հասցե՝ gevorg.mnatsakanyan@conservatory.am

Երևանի Կոմիտասի անվան Պետական Կոնսերվատորիայում տեղի ունեցավ հանդիպում Էրազմուս+ ծրագրի մասնակիցների հետ

Ապրիլի 10, 2019, Երևան – Ս.թ. ապրիլի 9-ին Երևանի Կոմիտասի անվան Պետական Կոնսերվատորիայում տեղի ունեցավ հանդիպում Էրազմուս+ ծրագրին մասնակցած ԵՊԿ-ի Լարային ամբիոնի դասախոս, դոցենտ Արամ Թալալյանի (թավջութակ), Դաշնամուրային ֆակուլտետի չորրորդ կուրսի ուսանող Մարտին Շահբազյանի և ծրագրի շրջանակներում ԵՊԿ-ում երկշաբաթյա վարպետության դասեր տալու համար Հայաստանում գտնվող Ֆինլանդիայի Տուրկու Կիրառական Գիտությունների Համալսարանի Արվեստի ակադեմիայի ավագ դասախոս, թավջութակահար Էոկի Լահեսմայի հետ: Հանդիպումը հնարավորություն ընձեռնեց ներկաներին մանրամասն ծանոթանալու Էրազմուս+ ծրագրին և լսելու ծրագրի մասնակիցների տպավորությունները իրենց փորձի մասին:

«1987 թվականից ի վեր Էրազմուս ծրագրի շրջանակներում իրականացված կրթական և մշակութային փոխանակման ծրագրերը մեծապես նպաստել են երաժշտական մշակույթի զարգացմանը», – իր բացման խոսքում ասաց ԵՊԿ-ի Ուսումնական գծով պրոռեկտոր Արամ Հովհաննիսյանը, բացատրելով, որ Էրազմուսի պես ծրագրերը թույլ են տալիս երաժիշտներին կիսվել իրենց փորձով և կապեր հաստատել տարբեր մշակույթների ներկայացուցիչների հետ:

Պարոն Հովհաննիսյանի խոսքին հետևեց Հայաստանում Էրազմուս+ ծրագրի համակարգող Լանա Կառլովայի ելույթը, որի ընթացքում նա ներկայացրեց ծրագրի երեք Հիմնական Գործողությունները (ՀԳ), որոնք են՝ անհատների ուսումնական շարժունության (ՀԳ1), նորարարությանը միտված համագործակցության և լավագույն փորձի փոխանակման (ՀԳ2) և քաղաքական բարեփոխումների աջակցության գործողությունները, ինչպես նաև Արևելյան գործընկերության երկիր Հայաստանում իրականացված ծրագրերն ու դրանց արդյունքները:

Պրոֆեսոր Լահեսման, ով երկրորդ անգամն է գտնվում Հայաստանում Էրազմուս+ ծրագրի շրջանակներում, ասաց, որ փոխանակման ծրագրերի մասնակցության իր ավելին քան 20 տարվա փորձը մեծապես նպաստել է իր մասնագիտական զարգացմանը որպես երաժիշտ և մանկավարժ, ինչպես նաև հնարավորություն է տվել ծանոթանալ տարբեր մշակույթների հետ: «Հիացած եմ Երևանի Պետական Կոնսերվատորիայի ուսանողների վարպետության բարձր մակարդակով և սովորելու պատրաստակամությամբ: Շատ տպավորված եմ նաև Կոնսերվատորիայի դասախոսական կազմի նվիրվածությամբ իրենց մասնագիտությանը», – հավելեց Լահեսմանը:

Հանդիպման ավարտին Էրազմուս+ ծրագրին մասնակցության իր փորձի մասին խոսեց Մարտին Շահբազյանը, ով հանդիսանալով ԵՊԿ-ի առաջին ուսանողը Տուրկու Կիրառական Գիտությունների Համալսարանում, շեշտեց Էրազմուս+ ծրագրերի կարևոր դերը երաժշտի ինքնազարգացման, տարբեր մշակույթների փոխգործակցության, ինչպես նաև արտասահմանում Հայաստանն ու հայկական երաժշտական հարուստ մշակույթը ճանաչելի դարձնելու գործում:

Հանդիպմանը մասնակցում էր նաև ԵՊԿ-ի Դաշնամուրային ֆակուլտետի դասախոս, պրոֆ. Արմեն Բաբախանյանը, ով շուտով հանդես կգա վարպետության դասերով Տուրկու Կիրառական Գիտությունների Համալսարանում՝ Էրազմուս+ ծրագրի շրջանակներում:

Երևանի Կոնսերվատորիայի անվան Պետական Կոնսերվատորիան (ԵՊԿ) հիմնադրվել է 1921թ.՝ որպես երաժշտական ստուդիա, իսկ երկու տարի անց դարձել է Հայաստանում առաջին բարձրագույն երաժշտական կրթական հաստատությունը: Տեղակայված մայրաքաղաքի կենտրոնում՝ Օպերայի և բալետի ազգային ակադեմիական թատրոնի և ֆիլհարմոնիայի Մեծ համերգասրահի հարևանությամբ՝ ԵՊԿ-ի պրոֆեսորա-դասախոսական կազմը համալրված է Հայաստանի լավագույն երաժիշտներով՝ կոմպոզիտորներով, երաժշտագետներով, կատարողներով, որոնք աջակցում են ԵՊԿ-ի ավելին քան 1000 ուսանողներին պահպանել և հավերժացնել ինչպես հայկական, այնպես էլ միջազգային երաժշտության հարուստ ժառանգությունը: ԵՊԿ-ին և իր գործունեությանն ավելի մանրամասն ծանոթանալու համար այցելեք www.conservatory.am:

Հայաստանում Էրազմուս+ ծրագրի ազգային գրասենյակի գործունեության նպատակն է աջակցել Էրազմուս+ ծրագրի խթանմանն ու տարածմանը Հայաստանում: Էրազմուս+-ը հնարավորություն է տալիս ուսանողներին և հայաստանյան բուհերի աշխատակիցներին ուսանելու և (կամ) մասնագիտական փորձ ձեռք բերելու արտերկրում կրթաթոշակի կամ դրամաշնորհի միջոցով, տրամադրում է ամբողջական կրթաթոշակ միջազգային համատեղ մագիստրոսական ծրագրերում ներգրավվելու համար, խթանում է կրթական համակարգերի և բուհերի միջև համագործակցությունը և տեսանելի դարձնում վերջիններիս արդիականությունն ու միջազգայնացումը: Էրազմուս+ ծրագրի մանրամասներին կարող եք ծանոթանալ այստեղ՝ www.erasmusplus.am